

四庫全書

集部

欽定四庫全書

樂府詩集卷五十八

宋 郭茂倩輯

琴曲歌辭

思歸引

石崇

一曰離拘操琴操曰衛有賢女邠王聞其
賢而請聘之未至而王薨太子曰吾聞齊
桓公得衛姬而霸今衛女賢欲留之大夫

曰不可若賢必不我聽若聽必不賢不可
取也太子遂留之果不聽拘於深宮思歸
不得遂援琴而作歌曲終縊而死晉石崇
思歸引序曰崇少有大志晚節更樂放逸
因覽樂篇有思歸引古曲有弦無歌乃作
樂辭但思歸河陽別業與琴操異也樂府
解題曰若梁劉孝威胡地憑良馬備言思
歸之狀而已按謝希逸琴論曰箕子作離

拘操不言衛女作未知孰是

思歸引歸河陽假余翼鴻鶴高飛翔經芒阜濟河梁望
我舊館心悅康清渠激魚彷徨鴈驚泝波羣相將終日
周覽樂無方登雲閣列姬姜拊絲竹叩宮商宴華池酌
玉觴

同前

劉孝威

胡地憑良馬懷驕負漢恩甘泉烽火入回中宮室燔錦
車勞遠駕繡衣疲屢奔貳師已喪律都尉亦銷魂龍堆

求援急狐塞請先屯
檻下驅雙駿腰邊帶
兩韉乘障無期限思
歸安可論

一作言

同前

張祐

重重作閨清旦鐫兩耳深聲長不徹
深宮坐愁百年身一片玉中生憤血
焦桐罷彈絲自絕漠漠暗魂愁夜月
故鄉不歸誰共穴石上作蒲蒲九節

猗蘭操

孔子

一曰幽蘭操古今樂錄曰孔子自衛反魯

見香蘭而作此歌琴操曰猗蘭操孔子所
作孔子歷聘諸侯諸侯莫能任自衛反魯
隱谷之中見香蘭獨茂喟然歎曰蘭當為
王者香今乃獨茂與衆草為伍乃止車援
琴鼓之自傷不逢時託辭於香蘭云琴集
曰幽蘭操孔子所作也

習習谷風以陰以雨之于歸遠送於野何彼蒼天不
得其所逍遙九州無所定處時

一作世

人闇蔽不知賢者

年紀述邁一身將老

同前

辛得源

奏事傳青閭拂除乃陶嘉散條凝露彩含芳映日華已
知香若麝無怨直如麻不學芙蓉草空作眼中花

同前

韓愈

蘭之猗猗揚揚其香不採而佩於蘭何傷今天之旋其
曷為然我行四方以日以年雪霜買買薺麥之茂子如
不傷我不爾覲薺麥之茂薺麥之有君子之傷君子之

守

幽蘭五首

鮑照

傾暉引暮色孤景流思顏梅歇春欲罷期渡往不還

簾委蘭蕙露帳含桃李風攬帶昔何道坐令芳節終

結佩徒分明抱梁輒乖互華落知不終空愁坐相悞

眇眇蛸挂網漠漠蠶弄絲空慙不自信怯與君盡

一作
劃

期

陳國鄭東門古來共所知長袖暫徘徊駟馬停路岐

同前

崔塗

幽植衆能知貞芳只暗持自無君子佩未是國香衰白露沾長蚤青春到每遲不知當路草芳馥欲何為

將歸操

孔子

一日聊操琴操曰將歸操孔子所作也孔叢子曰趙使聘夫子夫子聞鳴犢與竇犢之見殺也回輿而旋為操曰將歸史記世家曰孔子既不得用於衛將西見趙簡子

至於河而聞竇鳴犢舜華之死臨河而歎
曰美哉水洋洋乎丘之不濟此命也夫子
貢曰何謂也孔子曰竇鳴犢舜華晉國之
賢大夫也趙簡子未得志之時須此兩人
而后從政及其已得志殺之乃從政夫鳥
獸之不義也尚知辟之況乎丘哉乃還息
乎聊鄉作為聊操以哀之徐廣曰竇鳴犢
舜華或作鳴鐸竇犢王肅曰聊操琴曲名

也

翱翔于衛復我舊居從我所好其樂只且

同前

韓愈

狄之水兮其色幽幽我將濟兮不得其由涉其淺兮石
齧我足乘其深兮龍入我舟我濟而悔兮將安歸尤歸
乎歸乎無與石鬪兮無應龍求

龜山操

韓愈

琴操曰龜山操孔子所作也季桓子受齊

女樂孔子欲諫不得退而望魯龜山作此
曲以喻季氏若龜山之蔽魯也

龜之氣兮不能雲

舊作
為

雨龜山拚兮不中梁柱龜之大

兮祇以奄魯知將墮兮哀莫余伍周公有思兮嗟余歸
輔

殘形操

韓愈

琴操曰殘形操魯子所作魯子夢一狸不
見其首而作此曲也

有獸維狸兮我夢得之其身孔明兮而頭不知吉凶何
為兮覺坐而思正咸上天兮識者其誰

雙燕離

梁簡文帝

琴集曰獨處吟流澌咽雙燕離處女吟四
曲其詞俱亡琴歷曰河間新歌二十一章
此其四曲也

雙燕有雄雌照日兩差池銜花落北戶逐蝶上南枝桂
棟本曾宿虹梁蚤自窺願得長如此無令雙燕離

同前

沈君攸

雙燕雙飛雙情想思容色已改故心不衰雙入幕雙出
帷秋風去春風歸幕上危雙燕離銜羽一別涕泗垂夜
夜孤飛誰相知左回右顧還相慕翩翩桂水不忍渡懸
目挂心思越路縈鬱摧折意不泄願作鏡鸞相對絕
鸞對鏡絕武本願
作鏡鸞相對絕

同前

李白

雙燕復雙燕雙飛令人羨玉樹珠閣不獨棲金窓繡戶

長相見柏梁失火去因入吳王宮吳宮又焚蕩鷗盡巢
亦空憔悴一身在孀雌憶故雄雙飛難再得傷我寸心
中

處女吟

魯處女

琴操曰處女吟魯處女所作也古今樂錄
曰魯處女見女貞木而作歌亦謂之女貞
木歌

菁菁茂木隱獨榮兮變化垂枝含蕤英兮修身養志建

令名兮厥道不同善惡并兮屈身身獨去微清兮懷忠
見疑何貪生兮

貞女行

梁簡文帝

琴操曰魯次室女作貞女引

借問懷春臺百尺凌雲霧此有歲寒松南臨女貞樹庭
花對帷滿隙月依枝度但使明妾心無嗟坐遲暮

同前

沈約

貞心信無矯傍隣也見疑輕生本非惜賤軀良足悲傳

芳託嘉樹弦歌寄好詞

列女操

孟郊

琴集曰楚樊姬作列女引

梧桐相待老鴛鴦會雙死貞婦貴徇夫捨生亦如此波
瀾誓不起妾心井中水

別鶴操

商陵牧子

崔豹古今注曰別鶴操商陵牧子所作也
娶妻五年而無子父兄將為之改娶妻聞

之中夜起倚戶而悲嘯牧子聞之愴然而
悲乃援琴而歌後人因為樂章焉琴譜曰
琴曲有四大曲別鶴操其一也

將乖比翼兮隔天端山川悠遠兮路漫漫攬衣不寐兮
食忘餐

同前

鮑照

雙鶴俱起時徘徊滄海間長弄若天漢輕軀似雲懸幽
客時結侶提攜游

一作到

三山青繳凌瑤臺丹蘿籠紫煙

海上疾風急三山多雲霧散亂一相失驚孤不得住緬
然日月馳遠一作已矣絕音儀有願而不遂無怨以生離
鹿鳴在深草蟬鳴隱高枝心自有所懷一作存旁人那得
知

同前

韓愈

雄鶴

一作鵠

銜枝來雌鶴啄泥歸巢成不生子大義當乖

離江漢水之大鶴身鳥之微更無相逢日安可相隨飛

別鶴

梁簡文帝

接翮同發燕孤飛獨向楚值雪已迷羣驚風復失侶

同前

吳均

別鶴尋故侶聯翩遼海間單棲孟津水驚淚隴頭山

同前

楊巨源

海鶴一為別高程方杳然影搖江海路思結瀟湘天皎
然仰白日真姿棲紫煙含情九霄際顧侶五雲前遐心
屬清都棲轡激朱弦超搖間雲雨迢遞各山川東南信
多水會合當有年雄飛戾冥冥此意何由傳

同前

王建

主人一去池水絕池鶴散飛不相別青天漫漫碧海重
知向何山風雪中萬里雖然音影在兩山終是死生同
池邊巢破松樹死樹頭年年鳥生子

同前

張籍

雙鶴出雲谿分飛各自迷空巢在松杪折羽落江泥尋
水終不飲逢林亦未棲別離應易老萬里兩淒淒

同前

杜牧

分飛其所從六翮勢摧風聲斷碧雲外影孤明月中青
田歸路遠月桂舊巢空矯翼知何處天涯不可窮

走馬引

張率

一曰天馬引崔豹古今注曰走馬引檣里
牧恭所作也為父報怨殺人而亡匿於山
之下有天馬夜降圍其室而鳴覺聞其聲
以為追吏奔而亡去明旦視之乃天馬跡
也因暢然大悟曰豈吾所處之將危乎遂

卷五十八
荷糧而逃入於沂澤中援琴而鼓之為天
馬之聲故曰走馬引也

良馬龍為友玉珂金作羈馳騫

一作相去

宛與洛半蹀復半

馳倏忽而千里光景不及移九方惜未見薛公寧所知
斂轡且歸去吾畏路傍兒

同前

李賀

我有辭鄉劍玉鋒堪截雲襄陽

一作長安

走馬客意氣自生

春朝嫌劍光靜莫嫌劍花冷能持劍向人不解持照身

一作解持
照身影

天馬引

傅 綽

驄色表連錢出冀復來燕
取用偏開地為歌乃號天權
奇意欲遠蹀躞勢難前
本珍白玉鐙因飾黃金鞭
願酬芻秣寵千里得千年

龍丘引

梁簡文帝

一日楚引琴操曰楚引者楚游子龍丘高
所作也龍丘高出游三年思歸故鄉望楚

而長歎故曰楚引

龍丘一回首楚路蒼無極水照弄珠影雲吐陽臺色浦
狹村煙度洲長歸鳥息游蕩逐春心空憐無羽翼

楚朝曲

吳邁遠

白雲紫藹荆山阿洞庭縱橫日生波幽芳遠客悲如何
繡被掩口越人歌壯年流瞻裏成和清貞空情感電過
初同末異憂愁多窮巷惻愴沉汨羅延思萬里挂長河
翻驚漢陰動湘娥

楚明妃曲

湯惠休

瓊臺彩楹桂寢雕費金閨流耀玉牖含英香芬幽藹珠
彩珍榮文羅秋翠紉綺春輕驂駕鸞鶴往來仙靈含姿
綿視微笑相迎結蘭枝送目成當年為君榮

渡易水

荆軻

一曰荆軻歌史記曰燕太子丹使荆軻刺
秦王丹送之至于易水之上軻使高漸離
擊筑荆軻和而歌為變徵之聲又前而為

此歌復為羽聲忼慨於是就車而去樂府
廣題曰後人以為琴中曲按琴操商調有
易水曲荆軻所作亦曰渡易水是也
風蕭蕭兮易水寒壯士一去兮不復還

同前

吳均

雜虜客來齊時余在角抵揚鞭渡易水直至龍城西日
昏笳亂動天曙馬爭嘶不能通瀚海無面見三齊

荆軻歌

陽綰

函谷路不通燕將重深功長虹貫白日易水急寒風壯
髮危冠下匕首地圖中琴聲不可識遺恨沒秦宮

力拔山操

項籍

漢書曰項羽壁垓下軍少食盡漢帥諸侯
兵圍之數重夜聞漢軍四面皆楚歌驚曰
漢已得楚乎何楚人多也起飲帳中有美
人姓虞氏常從駿馬名騅常騎乃悲歌忼
慨自為歌詩歌數曲美人和之羽泣下數

行遂上馬潰圍南出平明漢軍迺覺按琴
集有力拔山操項羽所作也近世又有虞
美人曲亦出於此

力拔山兮氣蓋世時不利兮騅不逝騅不逝兮可奈何
虞兮虞兮奈若何

項王歌

無復拔山力誰論蓋世才欲知漢騎滿但聽楚歌哀悲
看騅馬去泣望艤舟來

大風起

漢高帝

漢書曰高祖已定天下還過沛留置酒沛
宮悉召故人父老子弟佐酒發沛中兒得
百二十人教之歌酒酣帝擊筑自歌令兒
皆和習之帝自起舞禮樂志曰至孝惠時
以沛宮為原廟令歌兒習吹以相和常以
百二十人為員按琴操有大風起漢高帝
所作也

大風起兮雲飛揚威加海內兮歸故鄉安得猛士兮守四方

採芝操

四皓

琴集曰採芝操四皓所作也古今樂錄曰南山四皓隱居高祖聘之四皓不甘仰天歎而作歌按漢書曰四皓皆八十餘鬚眉皓白故謂之四皓即東園公綺里季夏黃公角里先生也崔鴻曰四皓為秦博士遭

世暗昧坑黜儒術於是退而作此歌亦謂
之四皓歌二說不同未知孰是

皓天嗟嗟深谷遙迤樹木莫莫高山崔嵬巖居穴處以
為幄茵曄曄紫芝可以療飢唐虞往矣吾當安歸

四皓歌

崔鴻

漠漠商洛深谷威夷曄曄紫芝可以療飢皇農邈遠余
將安歸駟馬高蓋其憂甚大富貴而畏人不如貧賤而
輕世

八公操

劉安

一曰淮南操古今樂錄曰淮南王好道正月上辛八公來降王作此歌謝希逸琴論曰八公操淮南王作也

煌煌上天照下土兮
知我好道公來下兮
公將與余生
毛羽兮超騰青雲
蹈梁甫兮觀見瑤光
過北斗兮馳乘
風雲使玉女兮含
精吐氣嚼芝草兮
悠悠將將天相保
兮

樂府詩集卷五十八

欽定四庫全書

樂府詩集卷五十九

宋 郭茂倩 輯

琴曲歌辭

昭君怨

王 嬙

樂府解題曰王嬙字昭君琴操載昭君齊國王穰女端正閒麗未嘗窺門戶穰以其有異於人求之者皆不與年十七獻之元

帝元帝以地遠不之幸以備後宮積五六
年帝每遊後宮常怨不出後單于遣使朝
貢帝宴之盡召後宮昭君盛飾而至帝問
欲以一女賜單于能者往昭君乃越席請
行時單于使在旁驚恨不及昭君至匈奴
單于大悅以為漢與我厚縱酒作樂遣使
報漢白璧一隻驃馬十匹胡地珍寶之物
昭君恨帝始不見遇乃作怨思之歌單于

死子世達立昭君謂之曰為胡者妻母為
秦者更娶世達曰欲作胡禮昭君乃吞藥
而死按漢書匈奴傳曰竟寧中呼韓邪來
朝漢歸王昭君號寧胡閼氏呼韓邪死子
雕陶莫皋立為復株絳若鞮單于復妻昭
君不言飲藥而死

秋木萋萋其葉萎黃有鳥處山集于苞桑養育毛羽形
容生光既得升雲上遊曲房離宮絕曠身體摧藏志念

抑沈不得頡頏雖得委食心有徊徨我獨伊何改往變
常翩翩之鷺遠集西羌高山峩峩河水泱泱父兮母兮
道里悠長嗚呼哀哉憂心惻傷

同前

王叔英妻劉氏

一生竟何定萬事最難保丹青失舊儀玉匣成秋草想
妾辭關淚至今猶未燥漢使汝南還殷勤為人道

同前

陳後主

圖形漢宮裏遙聘單于庭狼山聚雲暗龍沙飛雪輕笳

吟度隴咽笛轉出關鳴啼妝寒葉下愁眉塞月生只餘
馬上曲猶作別時聲

同前

白居易

明妃風貌最娉婷合在椒房應四星只得當年備宮掖
何曾專夜奉幃屏見疎從道迷圖畫知屈那教配虜庭
自是君恩薄如紙不須一向恨丹青

同前二首

張祜

萬里邊城遠千山行路難舉頭唯見月何處是長安

漢庭無大議戎虜幾先和莫羨傾城色昭君恨最多

同前

梁氏瓊

自古無和親貽災到妾身胡風嘶去馬漢月弔行輪衣
薄狼山雪妝成虜塞春回看父母國生死畢胡塵

明妃怨

楊凌

漢國明妃去不還馬駝弦管向陰山匣中縱有菱花鏡
羞到單于照舊顏

蔡氏五弄

琴歷曰琴曲有蔡氏五弄琴集曰五弄遊
春淥水幽居坐愁秋思並宮調蔡邕所作
也琴書曰邕性沈厚雅好琴道嘉平初入
青溪訪鬼谷先生所居山有五曲一曲製
一弄山之東曲常有仙人遊故作遊春南
曲有澗冬夏常淥故作淥水中曲即鬼谷
先生舊所居也深邃岑寂故作幽居北曲
高巖猿鳥所集感物愁坐故作坐愁西曲

灌水吟秋故作秋思三年曲成出示馬融
甚異之琴議曰隋煬帝以嵇氏四弄蔡氏
五弄通謂之九弄今按近世作者多因題
命辭無復本意云

遊春曲二首

王維

萬樹江邊杏新開一夜風滿園深淺色照在綠波中
上苑何窮樹花開次第新香車與絲騎風靜亦生塵

遊春辭二首

王維

曲江絲柳變煙條
寒骨冰隨暖氣銷
纔見春光生綺陌
已聞青樂動雲韶

經過柳陌與桃蹊
尋逐風光著處迷
鳥度時時衝絮起
花繁袞袞壓枝低

同前三首

令狐楚

晚遊臨碧殿
日上望春亭
芳樹羅仙仗
晴山展翠屏
一夜好風吹新花
一萬枝風前調玉管
花下簇金羈
閨闔春風起
蓬萊雪水消
相將折楊柳
爭取最長條

淶水曲

江 奂

塘上蒲欲齊汀洲杜將歇春心既易蕩春流豈難越桂
楫及晚風菱江映初月芳香若可贈為君步羅襪

同前

吳 均

香暖金堤滿湛淡春塘溢已送行臺花復倒高樓日

同前二首

江 洪

塵容不忍飾臨池客未歸誰能別淶水全取浣羅衣
潺湲復皎潔輕鮮自可悅橫使有情禽照影遂孤絕

同前

李白

淶水明秋月南湖採白蘋荷花嬌欲語愁殺蕩舟人

淶水辭

李賀

今宵好風月阿侯在何處為有傾城色一作人翻成足愁

苦東湖採蓮葉南湖拔蒲根一作折未持寄小姑且持

感愁魂一作感

秋風

幽居弄

顧況

苔衣生花露滴月入西林蕩東壁扣商占角兩三聲洞

戶谿牕一冥寂獨去滄洲無四鄰身嬰世網此何身關
情命曲寄惆悵久別江南山裏人

秋思二首

李白

春陽如昨日碧樹鳴黃鸝蕪然蕙草莫峴爾涼風吹天
秋木葉下月冷莎雞悲坐愁羣芳歇白露凋華滋

閔氏黃葉落妾望白登臺月出

一作海上

碧雲斷蟬聲

一作單于

秋色來胡兵沙塞合漢

一作望

使玉關回征客無歸日空

悲蕙草摧

同前二首

鮑溶

胡風吹雁翼，遠別無人鄉。
君近雁來處，幾回斷君腸。
昔奉千日書，撫心怨星霜。
無書又千日，世路重茫茫。
燕國有佳麗，蛾眉富春光。
自然君歸晚，花落君空堂。
君其若不然，歲晚雙鴛鴦。
顧兔蝕殘月，幽光不如星。
女兒晚事夫，顏色同秋螢。
秋日邊馬思，武夫不遑寧。
燕歌易水怨，劍舞蛟龍腥。
風折連枝樹，水翻無蒂萍。
立身多戶門，何必燕山銘。
生世不如鳥，雙雙比翼翎。

季秋天地閒

一作閒

萬物生意足我憂長於生安得及草

木試從古人願致酒歌秉燭燕趙皆世人詎能長似玉
俯憐老期近仰視日車速蕭颯御風君魂夢願相逐百
年夜銷半端為垂纓束

同前

司空曙

靜與嬾相偶年將衰共催前途歡不集往事恨空來晝
景委紅葉月華鋪綠苔沈思更何有結坐玉琴哀

同前

司空圖

身病時亦危逢秋多慟哭風波一搖蕩天地幾翻覆孤
螢出荒池落葉穿破屋勢利長草草何人訪幽獨

同前二首

王維

網軒涼吹動輕衣夜聽更長玉漏稀月渡天河光轉濕
鵲驚秋樹葉頻飛

宮連太液見蒼波暑氣微清秋意多一夜輕風蘋末起
露珠翻盡滿池荷

胡笳十八拍

蔡琰

後漢書曰蔡琰字文姬邕之女也博學有才辯又妙於音律適河東衛仲道夫亡無子歸寧于家興平中天下喪亂文姬沒於南匈奴在胡中十二年生二子曹操痛邕無嗣乃遣使者以金璧贖之而重嫁陳留董祀後感傷亂離追懷悲憤作詩二章蔡琰別傳曰漢末大亂琰為胡騎所獲在右賢王部伍中春月登胡殿感笳之音作詩

言志曰胡笳動兮邊馬鳴孤雁歸兮聲嚶
嚶唐劉商胡笳曲序曰蔡文姬善琴能為
離鸞別鶴之操胡虜犯中原為胡人所掠
入番為王后王甚重之武帝與邕有舊敕
大將軍贖以歸漢胡人思慕文姬乃捲蘆
葉為吹笳奏哀怨之音後董生以琴寫胡
笳聲為十八拍今之胡笳弄是也琴集曰
大胡笳十八拍小胡笳十九拍並蔡琰作

按蔡翼琴曲有大小胡笳十八拍沈遼集
世名流家聲小胡笳又有契聲一拍共十
九拍謂之祝家聲祝氏不詳何代人李良
輔廣陵止息譜序曰契者明會合之至理
殷勤之餘也李肇國史補曰唐有董庭蘭
善沈聲祝聲蓋大小胡笳云

第一拍

我生之初尚無為我生之後漢祚衰天不仁兮降亂離

地不仁兮使我逢此時干戈日尋兮道路危民卒流亡
兮共哀悲煙塵蔽野兮胡虜盛志意乖兮節義虧對殊
俗兮非我宜遭惡辱兮當告誰茄一會兮琴一拍心潰
死兮無人知

第二拍

戎羯逼我兮為室家將我行兮向天涯雲山萬重兮歸
路遐疾風千里兮揚塵沙人多暴猛兮如蝨蛇控弦被
甲兮為驕奢兩拍張懸兮弦欲絕志摧心折兮自悲嗟

第三拍

越漢國兮入胡城亡家失身兮不如無生
氈裘為裳兮骨肉震驚羯羶為味兮枉過我情
鞞鼓喧兮從夜達明風浩浩兮暗塞昏營傷今感昔兮三拍成銜悲畜恨兮何時平

第四拍

無日無夜兮不思我鄉土稟氣含生兮莫過我最苦天災國亂兮人無主唯我薄命兮沒戎虜俗殊心異兮身

難處嗜慾不同兮誰可與語尋思涉歷兮何艱阻四拍
成兮益悽楚

第五拍

雁南征兮欲寄邊心雁北歸兮為得漢音雁飛高兮邈
難尋空腸斷兮思悵悵攢眉向月兮撫雅琴五拍泠泠
兮意彌深

第六拍

冰霜凜凜兮身苦寒飢對肉酪兮不能飡夜聞隴水兮

聲嗚咽朝見長城兮路杳漫追思往日兮行李難六拍
悲來兮欲罷彈

第七拍

日暮風悲兮邊聲四起不知愁心兮說向誰是原野蕭
條兮烽戍萬里俗賤老弱兮少壯為美逐有水草兮安
家葺壘牛羊滿地一作野兮聚如蜂蟻草盡水竭兮羊馬
皆徙七拍流恨兮惡居於此

第八拍

為天有眼兮何不見我獨漂流為神有靈兮何事處我
天南海北頭我不負天兮天何配我殊匹我不負神兮
神何殛我越荒州製茲八拍兮擬排憂何知曲成兮轉
悲愁

第九拍

天無涯兮地無邊我心愁兮亦復然人生倏忽兮如白
駒之過隙然不得歡樂兮當我之盛年怨兮欲問天天
蒼蒼兮上無緣舉頭仰望兮空雲煙九拍懷情兮誰為

傳

第十拍

城頭烽火不曾滅疆場征戰何時歇殺氣朝朝衝塞門
胡風夜夜吹邊月故鄉隔兮音塵絕哭無聲兮氣將咽
一生辛苦兮緣別離十拍悲深兮淚代血

第十一拍

我非貪生而惡死不能捐身兮心有以生乃既得兮歸
桑梓死當埋骨兮長已矣日居月諸兮在我壘胡人寵

我今有二子鞠之育之不羞恥愍之念之兮生長邊鄙
十有一拍兮因茲起哀響兮徹心髓

第十二拍

東風應律兮暖氣多漢家天子兮布陽和羌胡踏舞兮
共謳歌兩國交歡兮罷兵戈忽逢漢使兮稱近詔遣千
金兮贖妾身喜得生還兮逢聖君嗟別二子兮會無因
十有二拍兮哀樂均去住兩情兮誰具陳

第十三拍

不謂殘生兮却得旋歸撫抱胡兒兮泣下霑衣漢使迎
我兮四牡駢駢胡兒號兮誰得知與我生先兮逢此時
愁為子兮日無光輝焉得羽翼兮將汝歸一步一遠兮
足難移魂消影絕兮恩愛遺十有三拍兮弦急調悲肝
腸攪刺兮人莫我知

第十四拍

身歸國兮兒莫知隨心懸懸兮長如飢四時萬物兮有
盛衰唯有愁苦兮不暫移山高地濶兮見汝無期更深

夜闌兮夢汝來斯夢中執手兮一喜一悲覺後痛吾心
兮無休歇時十有四拍兮涕淚交垂河水東流兮心是
思

第十五拍

十五拍兮節調促氣填胸兮誰識曲處穹廬兮偶殊俗
願歸來兮天從欲再還漢國兮歡心心有憶兮愁轉深
日月無私兮曾不照臨子母分離兮意難任同天隔越
兮如商參生死不相知兮何處尋

第十六拍

十六拍兮思茫茫我與兒兮各一方日東月西兮徒相望
望不得相隨兮空斷腸對萱草兮徒想憂忘彈鳴琴兮
情何傷今別子兮歸故鄉舊怨平兮新怨長泣血仰頭
兮訴蒼蒼生我兮獨罹此殃

第十七拍

十七拍兮心鼻酸關山阻脩兮行路難去時懷土兮枝
枯葉乾沙場白首兮刀痕箭瘢風霜凜凜兮春夏寒人

馬飢虺兮骨肉單豈知重得兮入長安歎息欲絕兮淚
闌干

第十八拍

胡笳本自出胡中綠琴翻出音律同十八拍兮曲雖終
響有餘兮思未窮是知絲竹微妙兮均造化之功哀樂
各隨人心兮有變則通胡與漢兮異域殊風天與地隔
兮子西母東苦我怨氣兮浩於長空六合離兮受之應
不容

胡笳十八拍

劉商

第一拍

漢室將衰兮四夷不賓
動干戈兮征戰頻
哀哀父母生育我見離亂兮當此辰
紗窗對鏡未經事將謂珠簾能蔽身
一朝虜騎入中國蒼黃處處逢胡人
忽將薄命委鋒鏑可惜紅顏隨虜塵

第二拍

馬上將余向絕域
厭生求死死不得
戎羯腥膻豈是人

豺狼喜怒難姑息行盡天山足霜霰風土蕭條近胡國
萬里重陰鳥不飛寒沙莽莽無南北

第三拍

如羈囚兮在縲紲憂慮萬端無處說使余力兮翦余髮
食余肉兮飲余血誠知殺身願如此以余為妻不如死
早被蛾眉累此身空悲弱質柔如水

第四拍

山川路長誰記得何處天涯是鄉國自從驚怖少精神

不覺風霜損顏色夜中歸夢來又去朦朧豈解傳消息
漫漫胡天叫不聞明明漢月應相識

第五拍

水頭宿兮草頭坐風吹漢地衣裳破羊脂沐髮長不梳
羔子皮裘領仍左狐襟貉袖腥復羶晝披行兮夜披卧
氈帳時移無定居日月長兮不可過

第六拍

怪得春光不來久胡中風土無花柳天翻地覆誰得知

如今正南看北斗姓名音信兩不通終日經年常閉口
是非取與在指搗言語傳情不如手

第七拍

男兒婦人帶弓箭塞馬蕃羊卧霜霰寸步東西豈自由
偷生乞死非情願龜茲箏箏愁中聽碎葉琵琶夜深怨
竟夕無雲月上天故鄉應得重相見

第八拍

憶昔私家恣嬌小遠取珍禽學馴擾如今淪棄念故鄉

悔不當初放林表朔風蕭蕭寒日暮星河寥落胡天曉
日夕思歸不得歸愁心想似籠中鳥

第九拍

當日蘇武單于問道是賓鴻解傳信學他刺血寫得書
書上千重萬重恨髯胡少年能走馬彎弓射飛無遠近
遂令邊雁轉怕人絕域何由達方寸

第十拍

恨凌辱兮惡腥羶憎胡地兮怨胡天生得胡兒欲棄捐

及生母子情宛然貌殊語異憎還愛心中不覺夫相牽
朝朝暮暮在眼前腹生手養寧不憐

第十一拍

日來月往相催遷迢迢星歲欲周天無冬無夏臥霜霰
水凍草枯為一年漢家甲子有正朔絕域三光空自懸
幾回鴻雁來又去腸斷蟾蜍虧復圓

第十二拍

破瓶落井空永沈故鄉望斷無歸心寧知遠使問姓名

漢語泠泠傳好音夢魂幾度到鄉國覺後翻成哀怨深
如今果是夢中事喜過悲來情不任

第十三拍

童稚牽衣雙在側將來不可留又憶還鄉惜別兩難分
寧棄胡兒歸舊國山川萬里復邊戍背面無由得消息
淚痕滿面對殘陽終日依依向南北

第十四拍

莫以胡兒可羞恥恩情亦各言其子手中十指有長短

截之痛惜皆相似還鄉豈不見親族念此飄零隔生死
南風萬里吹我心心亦隨風渡遼水

第十五拍

歎息襟懷無定分當時怨來歸又恨不知愁怨情若何
似有鋒鋌擾方寸悲歡並行情未快心意相尤自相問
不緣生得天屬親豈向仇讎結恩信

第十六拍

去時只覺天蒼蒼歸日始知胡地長重陰白日落何處

秋雁所向應南方平沙四顧自迷惑遠近悠悠隨雁行
征途未盡馬蹄盡不見行人邊草黃

第十七拍

行盡胡天千萬里惟見黃沙白雲起馬饑跑雪銜草根
人渴敲冰飲流水燕山髣髴辨烽戍鼙鼓如聞漢家壘
努力前程是帝鄉生前免向胡中死

第十八拍

歸來故鄉見親族田園半蕪春草綠明燭重然煨燼灰

寒泉更洗沈泥玉載持巾櫛禮儀好一弄絲桐生死足
出入關山十二年哀情盡在胡笳曲

胡笳曲

吳邁遠

輕命重意氣古來豈但今緩頰獻一說揚眉受千金邊
風落寒草鳴笳隊飛禽越情結楚思漢耳聽胡音既懷
離俗傷復悲朝光侵日當故鄉沒遙見浮雲陰

同前


陶弘景

負宸飛天歷與奪徒紛紜百年三五代終是甲辰君

同前二首

江洪

藏器欲逢時年來不相讓
紅顏征戍兒白首邊城將
落日慘無光臨河獨飲馬
颼颼夕風高聯翩飛雁下



樂府詩集卷五十九

欽定四庫全書

集部
樂府詩集卷六十五
六十二

詳校官庶吉士_臣柳邁祖

助教_臣常循覆勘

總校官知縣_臣繆琪
校對官編修_臣秦瀛
謄錄監生_臣孫承基

欽定四庫全書

樂府詩集卷六十

宋 郭茂倩 輯

琴曲歌辭

飛龍引

蕭 慤

河曲銜圖出江上負舟歸欲因作雨去還逐景雲飛引
高吹細管下徵泛長徽持此連清引春夜舞羅衣

同前二首

李 白

黃帝鑄鼎於荆山鍊丹砂丹砂成黃金騎龍飛上太清
家雲愁海思令人嗟宮中綵女顏如花飄然揮手凌紫
霞從風縱體登鑾車登鑾車侍軒轅遨遊青天中其樂
不可言

鼎湖流水清且閒軒轅去時有弓劍古人傳道流其間
後宮嬋娟多花顏乘鸞飛煙亦不還騎龍攀天造天關
造天關聞天語長雲河車載玉女載玉女過紫皇紫皇
乃賜白兔所搗之藥方後天而老凋三光下視瑤池見

王母蛾眉蕭瑟如秋霜

烏夜啼引

張籍

李勉琴說曰烏夜啼者何晏之女所造也
初晏繫獄有二烏止於舍上女曰烏有喜
聲父必免遂撰此操按清商西曲亦有烏
夜啼宋臨川王所作與此義同而事異

秦烏啼啞啞夜啼長安吏人家吏人得罪囚在獄傾家
賣產將自贖少婦起聽夜啼烏知是官家有赦書下牀

心喜不重寐未明上堂賀舅姑少婦語啼烏汝啼慎勿
虛惜汝庭樹作高巢年年不令傷爾雛

宛轉歌二首

劉妙容

一曰神女宛轉歌續齊諧記曰晉有王敬
伯者會稽餘姚人少好學善鼓琴年十八
仕於東宮為衛佐休假還鄉過吳維舟中
渚登亭望月悵然有懷乃倚琴歌泣露之
詩俄聞戶外有嗟賞聲見一女子雅有容

色謂敬伯曰女郎悅君之琴願共撫之敬
伯許焉既而女郎至姿質婉麗綽有餘態
從以二少女一則向先至者女郎乃撫琴
揮弦調韻哀雅類今之登歌曰古所謂楚
明君也唯嵇叔夜能為此聲自茲以來傳
習數人而已復鼓琴歌遲風之詞因歎息
久之乃命大婢酌酒小婢彈箏篴作宛轉
歌女郎脫頭上金釵扣琴弦而和之意韻

繁諧歌凡八曲敬伯唯憶二曲將去留錦
臥具繡香囊并佩一雙以遺敬伯敬伯報
以牙火籠玉琴軫女郎悵然不忍別且曰
深閨獨處十有六年矣邂逅旅館盡平生
之志蓋冥契非人事也言竟便去敬伯船
至虎牢戍吳令劉惠明者有愛女早世舟
中亡臥具於敬伯船獲焉敬伯具以告果
於帳中得火籠琴軫女郎名妙容字雅華

大婢名春條年二十許小婢名桃枝年十
五皆善彈箏篴及宛轉歌相繼俱卒唐李
端又有王敬伯歌亦出於此

月既明西軒琴復清寸心斗酒爭芳夜千秋萬歲同一
情歌宛轉宛轉淒以哀願為星與漢光影共徘徊

悲且傷參差淚成

一作幾

行低紅掩翠方無色金徽玉軫

為誰鏘歌宛轉宛轉情復悲願為煙與霧氤氳對容姿

同前

卽大家宋氏

風已清月朗琴復鳴掩抑非千態殷勤是一聲歌宛轉
宛轉和且長願為雙鴻鵠比翼共翱翔

日已莫長簷鳥應度此時望君君不來此時思君君不
顧歌宛轉宛轉那能異棲宿願為形與影出入恒相逐

同前二首

劉方平

星參差月二八燈五枝黃鶴瑤琴將別去芙蓉羽帳惜
空垂歌宛轉宛轉恨無窮願為波與浪俱起碧流中
曉將近黃姑織女銀河盡九華錦衾無復情千金寶鏡

誰能引歌宛轉宛轉傷別離願作楊與柳同向玉窓垂

同前

江總

九夕天河白露明八月濤水秋風驚樓中恒聞哀響曲
塘上復有苦辛行不解何意悲秋氣直置無秋悲自生
不怨前堦促織鳴偏愁便路搗衣聲別燕差池自有返
離蟬寂寞詎含情雲聚懷情四望臺月冷相思九重觀
欲題芍藥詩不成來采芙蓉花已散金樽送曲韓娥起
玉柱調弦楚妃歎翠眉結恨不復開寶鬢迎秋度前亂

湘妃拭淚灑貞筠
藥浣衣何處人
步步香飛金薄履
盈盈扇掩珊瑚脣
已言採桑期陌上
復能解佩就江濱
競入華堂要花枕
爭開羽帳奉華茵
不惜獨眼前下釣
欲許便作後來新
後來暝暝同玉牀
可憐顏色無比方
誰能巧笑特窺井
乍取新聲學繞梁
宿處留嬌墮黃珥
鏡前含笑弄明璫
採施摘心心不盡
茱萸折葉葉更芳
已聞能歌洞簫賦
詎是故愛邯鄲倡

宛轉行

張籍

華屋重翠幄綺席雕象牀遠漏微更疎薄衾中夜涼
爐氲暗徘徊寒煙背斜光妍姿結宵態寢壁幽夢長宛轉
復宛轉憶憶更未央

王敬伯歌

李端

妾本舟中客聞君江上琴君初感妾歎妾亦感君心遂
出合歡被同為交頸禽傳杯唯畏淺接膝猶嫌遠侍婢
奏瑩篴女郎歌宛轉宛轉怨如何中庭霜漸多霜多葉
可惜昨日非今夕徒結萬里歡終成一宵客王敬伯淥

水青山從此隔

三峽流泉歌

李季蘭

琴集曰三峽流泉晉阮咸所作也

妾家本住巫山雲巫山流水常自聞玉琴彈出轉寥夙
直似當年夢中聽三峽流泉幾千里一時流入深閨裏
巨石奔崖指下生飛波走浪弦中起初疑噴湧含雷風
又似鳴咽流不通回湍曲瀨勢將盡時復滴瀝平沙中
憶昔阮公為此曲能使仲容聽不足一彈既罷復一彈

願似流泉鎮相續

風入松歌

僧皎然

琴集曰風入松晉嵇康所作也

西嶺松聲落日秋
千枝萬葉風飈飈
美人援琴弄成曲
寫得松間聲斷續
聲斷續清我魂流
波壞陵安足論美
人夜坐月明裏
含少商兮照清徵
風何淒兮飄颻攪
寒松兮又夜起
夜未央曲何長
金徽更促聲泱泱
何人此時不得意
意若弦悲聞客堂

秋風

吳邁遠

寒鄉無異服衣氎代文練月月望君歸年年不解線荆
揚早春和幽冀猶霜霰地寒妾已知南心君不見

同前

湯惠休

秋風嫋嫋入曲房羅帳含月思心傷蟋蟀夜鳴斷人腸
長夜思君心飛揚他人相思君相忘錦衾瑤席為誰芳

同前三首

江洪

先拂連雲臺罷入迎風殿已折池中荷復驅簷裏鶯

北牖風摧樹南籬寒蛩吟庭中無限月思婦夜鳴砧
孀婦悲四時況在秋閨內淒葉留晚蟬虛庭吐寒菜

秋風引

劉禹錫

何處秋風至蕭蕭送雁羣朝來入庭樹孤客最先聞

明月引

盧照隣

洞庭波起兮鴻雁翔風瑟瑟兮野蒼蒼浮雲卷靄明月
流光荆南兮趙北碣石兮瀟湘澄清規於萬里照離思
於千行橫桂枝於西第繞菱花於北堂高樓思婦飛蓋

君王文姬絕域侍子他鄉見胡鞍之似練知漢劍之如霜試登高而極目莫不變而迴腸

明月歌

閻朝隱

梅花雪白柳葉黃雲霧四起月蒼蒼箭水泠泠漏刻長揮玉指拂羅裳為君一奏楚明光

綠竹

吳均

嬋娟鄣綺殿繞弱拂春漪何當逢採拾為君笙與篴

綠竹引

宋之問

青溪綠潭潭水側修竹嬋娟同一色徒生仙實鳳不遊
老死空山人詎識妙年秉願逃俗紛歸臥嵩丘弄白雲
含情傲慰心目何可一日無此君

山人勸酒

李白

蒼蒼雲松落落綺皓春風爾來為阿誰蝴蝶忽然滿芳
草秀眉霜雪顏桃花骨青髓綠長美好一作秀眉雪霜
桃花貌青髓綠

髮長美好

稱是秦時避世人勸酒相歡不知老各守兔鹿志

恥隨龍虎爭歛起佐太子漢王

一作皇

乃復驚顧謂戚夫

人彼翁羽翼成歸來南

一作商

山下泛若雲無情舉觴酌

巢由洗耳何獨

一作太

清浩歌望嵩嶽意氣還

一作遠

相傾

幽澗泉

李白

拂彼白石彈吾素琴幽澗愀兮流泉深善手明徽高張
清心寂歷似千古松飈飈兮萬尋中見愁猿弔影而危
處兮叫秋木而長吟客有哀時失志而聽者淚淋浪以
沾襟乃緝商綴羽潺湲成音吾但寫聲發情於妙指殊
不知此曲之古今幽澗泉鳴深林

龍宮操

顧況

顧況曰壬子癸丑二年大水時在滁遂作
此操蓋大歷中也

龍宮月明光參差精衛銜石東飛時
鮫人織綃採藕絲
翻江倒漢傾吳蜀漢女江妃杳相續
龍王宮中水不足

飛鳶操

劉禹錫

鳶飛杳杳青雲裏
鳶鳴蕭蕭風四起
旗尾飄揚勢漸高
箭頭剝劃聲相似
長空悠悠霽日懸
六翮不動凝飛煙

遊鷗翔雁出其下慶雲清景相迴旋忽聞飢鳥一噪聚
瞥下雲中爭腐鼠騰音礪吻相喧呼仰天大嚇疑鴛鴦
畏人避犬投高處俛啄無聲猶屢顧青鳥自愛玉山木
仙禽徒貴華亭露樸檄危巢向莫時羶羶飽腹蹲枯枝
遊童挾彈一麾肘臆碎羽分人不悲天生衆禽各有類
威鳳文章在仁義鷹隼儀形螻蟻心雖能戾天何足貴

昇仙操

李羣玉

羸女去秦宮瓊蕭生碧空鳳臺閉煙霧鸞吹飄天風復

聞周太子亦遇浮丘公叢簧發仙弄輕舉紫霞中濁世
不久住清都路何窮一去霄漢上世人那得逢

成連

辛得原

征夫從遠役歸望絕雲端簑笠城踰壞桑落梅初寒雪
夜然燈濕冰朝飲馬難寂寂長安信誰念客衣單

琴歌三首

百里奚妻

風俗通曰百里奚為秦相堂上樂作所賃
澣婦自言知音因援琴撫弦而歌問之乃

其故妻還為夫婦也亦謂之屢屨字說曰

門闢謂之屨屨或作剡移

百里奚五羊皮憶別時烹伏雌炊屨屨今日富貴忘我為

百里奚初娶我時五羊皮臨當別時烹乳雞今適富貴忘我為

百里奚百里奚母已死葬南谿墳以瓦覆以柴春黃黎搯伏雞西入秦五羖皮今日富貴捐我為

同前二首

琴集曰司馬相如客臨邛富人卓王孫有
女文君新寡竊於壁間見之相如以琴心
挑之為琴歌二章按漢書相如飲卓氏弄
琴文君竊從戶窺心悅而好之乃夜亡奔
相如相如與馳歸成都後俱如臨邛是也
鳳兮鳳兮歸故鄉遨遊四海求其凰時未遇兮無所將
何悟今夕升斯堂有豔淑女在閨房室邇人遐毒我腸

何緣交頸為鴛鴦胡頡頏兮共翱翔

鳳兮鳳兮歸故鄉遨遊四海求其凰時未遇兮無所將
中夜相從知音誰雙翼俱起翻高飛無感我思使余悲

司馬相如琴歌

張祜

鳳兮鳳兮非無凰山重水闊不可量梧桐結陰在朝陽
濯雨弱水鳴高翔

琴歌

霍去病

古今樂錄曰霍將軍去病益封萬五千戶

秩祿與大將軍等於是志得意歡而作歌
按琴操有霍將軍渡河操去病所作也

四夷既護諸夏康兮國家安寧樂未央兮載戢干戈弓
矢藏兮麒麟來臻鳳凰翔兮與天相保永無疆兮親親
百年各延長兮

霍將軍

崔灝

長安甲第高入雲誰家居住霍將軍日晚朝回擁賓從
路傍揖拜何紛紛莫言炙手手可熱須臾火盡灰亦滅

莫言貧賤即可欺人生富貴自有時一朝天子賜顏色
世上悠悠應自知

琴歌

魏書曰太祖雅聞阮瑀辟之不應乃逃入
山中焚山得瑀太祖大延賓客怒瑀不與
語使就技人列瑀善解音能鼓琴撫弦而
歌為曲既捷音聲殊妙

奕奕天門開大魏應期運青蓋巡九州在東西人怨士

為知己死女為悅者玩恩義苟潛暢他人豈能亂

同前二首

趙整

晉書曰苻堅末年怠於為政趙整援琴作歌二章以諷

昔聞盟津河千里作一曲此水本自清是誰亂使濁
北園有棗樹布葉垂重陰外雖多棘刺內實有赤心

同前

趙整

晉書載記曰苻堅分氏戶於諸鎮趙整因

侍援琴而歌堅笑而不納及敗于姚萇果

如整言

阿得脂阿得脂博勞舊父是仇綏尾長翼短不能飛遠
徙種人留鮮卑一旦緩急語阿誰

琴歌

顧況

琴調秋些胡風遠雪峽泉聲咽佳人愁些

樂府詩集卷六十

欽定四庫全書

樂府詩集卷六十一

宋 郭茂倩 輯

雜曲歌辭

宋書樂志曰古者天子聽政使公卿大夫
獻詩者父修之而後王斟酌焉然後被於
聲於是有採詩之官周室下衰官失其職
漢魏之世歌詠雜興而詩之流乃有八名

曰行曰引曰歌曰謠曰吟曰詠曰怨曰歎
皆詩人六義之餘也至其協聲律播金石
而總謂之曲若夫均奏之高下音節之緩
急文辭之多少則繫乎作者才思之淺深
與其風俗之薄厚當是時如司馬相如曹
植之徒所為文章深厚爾雅猶有古之遺
風焉自晉遷江左下逮隋唐德澤寢微風
化不競去聖逾遠繁音日滋艷曲興於南

朝胡音生於北俗哀淫靡曼之辭迭作並
起流而忘反以至凌夷原其所由蓋不能
制雅樂以相變大抵多溺於鄭衛由是新
聲熾而雅音廢矣昔晉平公說新聲而師
曠知公室之將卑李延年善為新聲變曲
而聞者莫不感動其後元帝自度曲被聲
歌而漢業遂衰曹妙達等改易新聲而隋
文不能救嗚呼新聲之感人如此是以為

世所貴雖沿情之作或出一時而聲辭淺
迫少復近古故蕭齊之將亡也有伴侶高
齊之將亡也有無愁陳之將亡也有玉樹
後庭花隋之將亡也有泛龍舟所謂煩手
淫聲爭新怨衰此又新聲之弊也雜曲者
歷代有之或心志之所存或情思之所感
或宴遊懽樂之所發或憂愁憤怨之所興
或叙離別悲傷之懷或言征戰行役之苦

或緣於佛老或出自夷虜兼收備載故總
謂之雜曲自秦漢已來數千百歲文人才
士作者非一干戈之後喪亂之餘亡失既
多聲辭不具故有名存義亡不見所起而
有古辭可考者則若傷歌行生別離長相
思東下何慕纂之類是也復有不見古辭
而後人繼有擬述可以概見其義者則若
出自薊北門結客少年場秦王解衣半渡

溪空城雀齊謳吳趨會吟悲哉之類是也
又如漢阮瑀之駕出北郭門曹植之惟漢
苦思欲遊南山事君車已駕桂之樹等行
磐石驅車浮萍種葛吁嗟鰕鱉等篇傳玄
之雲中白子高前有一樽酒鴻雁生塞北
行昔君飛塵車遙遙篇陸機之置酒謝惠
連之晨風鮑照之鴻雁如此之類其名甚
多或因意命題或學古叙事其辭具在故

不復備論

蜨蝶行

古辭

蜨蝶之遨遊東園奈何卒逢三月養子鶯接我首偕間
持之我入紫深宮中行纏之傳樽櫨間雀來鶯鶯子見
銜哺來搖頭鼓翼何軒奴軒

同前

李鏡遠

青春已布澤微蟲應節歡朝出南園裏莫依華葉端菱
舟追或易風池渡更難羣飛終不遠還向玉堦蘭

桂之樹行

曹植

桂之樹桂之樹桂生一何麗佳楊朱華而翠葉流芳布
天涯上有棲鸞下有盤螭桂之樹得道之真人咸來會
講仙教爾服食日精要道甚省不煩澹泊無為自然乘
蹻萬里之外去留隨意所欲存高高上際於衆外下下
乃窮極地天

秦女休行

左延年

左延年辭大略言女休為燕王婦為宗報

雖殺人都市雖被囚繫終以宥赦得寬刑
戮也晉傳玄云龐氏有烈婦亦言殺人報
怨以烈義稱與古辭義同而事異

始出上西門遙望秦氏廬秦氏有好女自名為女休休
年十四五為宗行報讎左執白楊刃右據宛魯矛讎家
便東南闕僵秦女休女休西上山上山四五里闕吏呵
問女休女休前置辭平生為燕王婦於今為詔獄囚平
生衣參差當今無領襦明知殺人當死兄言快快弟言

金史卷六十一
無道憂女休堅辭為宗報讎死不疑殺人都市中傲我
都巷西丞卿羅東向坐女休悽悽曳桮前兩徒夾我持
刀刀五尺餘刀未下腫朧擊鼓赦書下

同前

傳立

龐氏有烈婦義聲馳雍涼父母家有重怨仇人暴且疆
雖有男兄弟志弱不能當烈女念此痛丹心為寸傷外
若無意者內潛思無方白日入都市怨家如平常匿劍
藏白刃一奮尋身僵身首為之異處伏尸列肆旁肉與

土合成泥灑血濺飛梁猛氣上干雲
冤仇黨失守為披
攘一市稱烈義觀者收淚並慨慷
百男何當益不如一
女良烈女直造縣門云父不幸遭禍歿今仇身以分裂雖
死情益揚殺人當伏法義不苟活墮舊章縣令解印綬
令我傷心不忍聽刑部垂頭塞耳令我吏舉不能成烈
著希代之績義立無窮之名夫家同受其祚子子孫孫
咸享其榮今我絃歌吟詠高風激揚壯發悲且清

同前

李白

西門秦氏女秀色如瓊花手揮白揚刃清晝殺讎家羅
袖灑赤血英聲凌紫霞直上西山去關吏相邀遮婿為
燕國王身被詔獄加犯刑若履虎不畏落爪牙素頸未
及斷摧眉伏泥沙金雞忽放赦大辟得寬賒何慙聶政
姊萬古共驚嗟

當牆欲高行

曹植

龍欲升天須浮雲人之仕進待中人衆口可以鑠金讒
言三至慈母不親憤憤俗間不辨偽真願欲披心自說

陳君門以九重道遠河無津

當欲遊南山行

曹植

東海廣且深由卑下百川五嶽雖高大不逆垢與塵良
木不十圍洪條無所因長者能博愛天下寄其身大匠
無棄材船車用不均錐刀各異能何所獨却前嘉善而
矜愚大聖亦同然仁者各壽考四坐咸萬年

當事君行

曹植

人生有所貴尚出門各異情朱紫更相奪色雅鄭異音

聲好惡隨所愛憎追舉逐虛名百心可事一君巧詐寧拙誠

當車已駕行

曹植

坐玉殿會諸貴客侍者打觴主人離席顧視東西箱絲竹與鞞鐸不醉無歸來明燈以繼夕

驅車上東門行

古辭

驅車上東門遙望北郭墓白楊何蕭蕭松柏夾廣路下有陳死人杳杳即長暮潛寐黃泉下十載永不寤浩浩

陰陽移年命如朝露人生忽如寄壽無金石固萬歲更
相送賢聖莫能度服食求神仙多為藥所誤不如飲美
酒被服紬與素

駕言出北闕行

陸機

駕言出北闕躑躅遵山陵長松何鬱鬱丘墓互相承念
昔殂沒子悠悠不可勝安寢重冥廬天壤莫能與人生
何期促忽如朝露凝辛苦百年間戚戚如履冰仁智亦
何補遷化有明徵求仙鮮克仙太虛安可凌良會罄美

服對酒宴同聲

駕出北郭門行

阮瑤

駕出北郭門馬樊不肯馳下車步踟躕仰折枯楊枝顧
聞丘林中噉噉有悲啼借問啼者出何為乃如斯親母
舍我沒後母憎孤兒饑寒無衣食舉動鞭撻施骨消肌
肉盡體若枯樹皮藏我空室中父還不能知上冢察故
處存亡永別離親母何可見淚下聲正嘶棄我於此間
窮厄豈有賢傳告後代人以此為明規

出門行二首

孟郊

長河悠悠去無極百齡同此可歎息秋風白露沾人衣
壯心凋落奪顏色少年出門將訴誰川無梁兮路無岐
一聞陌上苦寒奏使我佇立驚且悲君今得意厭梁肉
豈復念我貧賤時

海風蕭蕭天雨霜窮愁獨坐夜何長駟車舊憶太行陰
始知遊子悲故鄉美人相思隔天闕長望雲端不可越
手持琅玕欲有贈愛而不見心斷絕南山峩峩白石爛

碧海之波浩漫漫參辰出沒不相待我欲橫天無羽翰

出門行

元稹

兄弟同出門同行不同志悽悽分岐路各各營所為兄
上荆山巔翻石辨虹氣弟沈滄海底偷珠待龍睡出門
不數年同歸亦同遂俱用私所珍升沉自茲異獻珠龍
王宮值龍覓珠次但喜復得珠不求珠所自酬客雙龍
女授客六龍轡遣充行雨神雨澤隨客意雩夏鐘鼓繁
榮扶玉帛積彩色畫廊廟奴僮被珠翠驥驟千萬雙駕

驚七十二言者禾稼枯無人敢輕議其兄因獻璞再刖
不履地門戶親戚疎匡牀妻妾棄銘心有所待視足無
所媿持璞自枕頭淚痕雙血漬一朝龍醒寤本問偷珠
事因知行雨偏妻子五刑備仁兄捧屍哭勢友掉頭諱
喪車黔首塋弔客青蠅至楚有望氣人王前忽長跪賀
王得貴寶不遠王所莅求之果如言剖則浮筠膩白珩
無顏色垂棘有瑕累在楚列地封入趙連城貴秦遣李
斯書書為傳國瑞秦亡漢魏傳傳者得神器卞和名永

金史卷六十一
永興寶不相墜勸爾出門行行難莫行易易得還易失
難同亦難離善賈識貪廉良田無植穉磨劍莫磨錐磨
錐成小利

出自薊北門行

鮑照

魏曹植艷歌行曰出自薊北門遙望胡地
桑枝枝自相值葉葉自相當樂府解題曰
出自薊北門行其致與從軍行同而兼言
燕薊風物及突騎勇悍之狀若鮑照云羽

檄起邊亭備叙征戰苦辛之意通典曰燕
本秦上谷郡薊即漁陽郡皆在遼西漢書
曰薊古燕國也

羽檄起邊亭烽火入咸陽徵師屯廣武分兵救朔方嚴

秋筋

一作筋

竿勁虜陣精且疆天子按劍怒使者遙相望

雁行緣石徑魚貫度飛梁簫鼓流漢思旌甲被胡霜疾
風衝塞起沙礫自飄揚馬毛縮如蝟角弓不可張時危
見臣節世亂識忠良投軀報明主身死為國殤

同前

徐陵

薊北聊相望
黃昏心獨愁
燕山對古剎
代郡隱城樓
屢戰橋恒斷
長冰壑不流
天雲如虵陣
漢月帶胡愁
漬土泥函谷
按繩縛涼州
平生燕頷相
會自得封侯

同前

庾信

薊門還北望
役役盡傷情
關山連漢月
隴水向秦城
茹寒蘆葉脆
弓凍紆弦鳴
梅林能止渴
複姓可防兵
將軍連轉戰
都護夜巡營
燕山猶有石
須勒幾人名

同前

李白

虜陣橫北荒胡星耀精芒羽書速驚電烽火晝連光虎
竹救邊急戎車森已行明主不安席按劍心飛揚推轂
出猛將連旗登戰場兵威衝絕漠殺氣凌穹蒼列卒一作

陣赤山下開營紫塞傍孟冬風沙緊旌旗颯凋傷畫角

悲海月征衣卷天霜揮刃斬樓蘭彎弓射賢王單于一

平蕩種落自奔亡收功報天子行歌一作歌舞歸咸陽

薊門行五首

高適

邊城十一月雨雪亂霏霏元戎號令嚴人馬亦輕肥羌
胡無盡日征戰幾時歸

幽州多騎射結髮重橫行一朝事將軍出入有聲名紛
紛獵秋草相向角弓鳴

薊門逢故老獨立思氛氲一身既零丁頭鬢白紛紛勲
庸今已矣不識霍將軍

茫茫長城外日沒更煙塵胡騎雖憑陵漢兵不顧身古
樹滿空塞黃雲愁殺人

漢家能用武開拓窮異域戍卒厭糠覈降胡飽衣食開
亭試一望吾欲涕霑臆

同前

李希仲

旄頭有精芒胡騎獵秋草羽檄南渡河邊庭用兵早漢
家愛征戰宿將今已老辛苦羽林兒從戎榆關道一身
救邊速烽火連薊門前軍鳥飛斷格鬪塵沙昏寒日鼓
聲急單于夜火奔當須徇忠義身死報國恩

君子有所思行

陸機

樂府解題曰君子有所思行晉陸機云命
駕登北山宋鮑照云西山登雀臺梁沈約
云晨策終南首其旨言雕室麗色不足為
久懽宴安酖毒滿盈所宜敬忌與君子行
異也

命駕登北山延佇望城郭廛里一何盛街巷紛漠漠甲
第崇高閨洞房結阿閣曲池何湛湛清川帶華薄邃宇
列綺窗蘭室接羅幕淑貌色斯升哀音承顏作人生盛

行邁

一作人生
誠行過

容華隨年落善哉膏粱士營生奧且博

宴安消靈根酖毒不可恪無以肉食資取笑藜

一作葵

與

藿

同前

謝靈運

總駕越鍾陵還顧望京畿躅躑周名都遊目倦

一作卷

忘

歸市鄧無阨

一作夾

室世族有高闌密親麗華苑軒甍飾

通達孰是金張樂諒由燕趙詩長夜恣酣飲窮年弄音

徽盛往速露墜衰來疾風飛餘生不歡娛何以竟暮歸

寂寥曲肱子飄飲療朝饑所秉自天性貧富豈相譏

同前

鮑照

西上登雀臺東下望雲闕層闕肅天居馳道直如髮繡

薨結飛霞璇題納明

一作行

月築山擬蓬壺穿池類溟渤

選色徧齊代徵聲匝邛越陳鍾陪夕宴笙歌待明發年
貌不可留身意會盈歇蟻壤漏山河絲淚毀金骨罷惡
舍滿歌物忌厚生沒智哉衆多士服理辨昭晰

同前

沈約

晨策終南首顧望咸陽川
咸里遡曾闕甲館負崇軒
複塗希紫閣重臺擬望仙
已姬幽蘭奏鄭女陽春弦
共矜紅顏日俱忘白髮年
寂寥茂陵宅照曜未央蟬
無以五鼎盛顧嗤三經玄

同前

李白

紫閣連終南青冥天倪色憑厓望咸陽宮闕羅北極萬
井驚畫出九衢如弦直渭水清銀河橫天流不息朝野
盛文物衣冠何貪絕廐馬散連山軍容威絕域伊臯運

元化衛霍輸筋力歌鐘樂未休榮去老還逼圓光過滿
缺太陽移中晷不散東海金何爭西輝匿無作牛山悲
惻愴淚沾臆

同前二首

僧貫休

我愛正考甫思賢作商頌我愛揚子雲理亂皆如鳳振
衣中夜起露花香旖旎撲碎驪龍明珠敲出鳳凰五
色髓陋巷蕭蕭風淅淅緬想斯人勝圭壁寂寥千載不
相逢無限區區盡虛擲君不見沈約道佳人不在茲春

光為誰惜

安得龍猛筆點石為黃金散問

一作向

酷吏家使無貪殘

心甘棠密葉成翠幄潁鳳不來天地塞所以傾城人如
今不可得

樂府詩集卷六十一